

عندي فرخة "من وحي أنفلونزا الطيور"

عندي فرخة جوا العشة
لقيتها قاعدة في ركن وكاشة
مديت إيدي أجس دماغها
لقيتها نار وماسكها رعشة
قلت أكيد دي الأنفلونزا
وجريت بها ع الدكتور حمزة
حط على وراكها السماعة
وقعد يسمع كدة يبجي ساعة
وأنا قلبي بيرجف يا جماعة
مش عارف أيه اللي جرى لها
مد إديه ومسك منقارها
فتحه وقال لها قولي كاك
وبصوت مبحوح قالت كاك
قال أنفلونزا شديدة وماسكة
من راسها لحد الأوراك
ولقيتني من خوفي بكيت
وفي حضني خدتها وجريت
ورجعت بيها قوام ع البيت
قلتلها أيه بس جراك
قالت أقولك قلت يا ريت

قالت فاتحة التلفزيون
وجبت قناة الفيديو كليب
ولقيت عالم كله جنون
وبنات بتشب وبتلب
صدرها باين بطنها باينة
وكل شيء معمول له معاينة
ولقيت ديكي بيصرخ فيا
شايفة يا فرخة بقا الحرية
قومي اتهزي قوام يا ولية
حزقي ريشك حبة في حبة
وارفعي ريشك فوق الركبة
اعملي ريشك ميكروجيب
وانتفي ريشك من فوق صدرك
خلي الصدر يبان ويقب
زي بنات الفيديو كليب
وطاوعته ودي كانت واقعة
طول الليل وأنا قاعدة وقالعة
فجأة لقيتني هموت م الساعة
خرجت عطسة من نخاشيشي
قمت بسرعة ألملم ريشي
وطول الليل وأنا نائمة أسب
يخرّب بيت الفيديو كليب